

Umens chantan rumantsch a Turitg – prest dapi 75 onns

In'emproma per il concert da giubileum

DA CLAUDIA CADRUVI / ANR

■ **I regia in'atmosfera empernaivla durant l'emproma en la chasa da scola Letten. L'emprim mussa il dirigent Claudio Darms co ch'igl è da schluc-car il corp. Ils chantadurs splatschan la baratscha, las chommas, il venter ed il tapun.** Suentar fan els exerchezis cun la vusch e chantan ina chanzun ch'els san bain. Igl è «Cantei Romontschs». Lura vegnì serius. I vegnì lavurà vi da la messa latina. Do-mi-ne fi-li u-ni-ge-ni-te vegn repetì e repetì fin ch'i sesa en mintga singula vusch. E lura ensemen. Per l'emprima giada na tuni gnanc uschè mal.

Cun la messa latina da Josef Gabriel Rheinberger vegn il Chor viril Grischun Turitg a festivar l'onn proxim ses giubileum da 75 onns. Il concert da giubileum vegn dà ensemen cun in segund chor viril. Plinavant è planisà d'engaschar in pitschen orchester.

Accumpagnà il cusseglier federal

Ils 25 da schaner 1933 han ins fundà il Chor viril Grischun Turitg. Gia in onn pli tard ha il chor da 63 umens gi sia emprima representaziun al radio.

In interessant detagl ord las annalas: Il 1938 ha il chor accumpagnà cusseglier federal Philipp Etter sin sia tura da propaganda. Etter ha tegnì referats en differents citads da la Svizra e propagà il rumantsch sco «nova» lingua naziunala. Ils 26 da favrer 1938 ha il pievel svizzer lura decidì a l'urna ch'il rumantsch duai daventar quart linguatg naziunal. Tgi sa, sch'il bun resultat da votaziun è forsa era d'engraziar in zichel a las vuschs sonoras dal chor viril Turitg?

Pitschens e gronds concerts

Oz dumbra il chor 26 chantadurs. La gronda part deriva da la Sur- e Sutselva.

Tgi less chantar mo in onn?

Tgi ha gust da chantar, ma na less betg s'obligar per pli ditg? Il Chor viril Grischun da Turitg tschertga chantadurs che sa participeschan l'atun 2008 al concert da giubileum. Cun las empromas da la messa latina da Josef Gabriel Rheinberger ha il chor gist cumenzà. Ma novs chantadurs èn anc adina bainvegnids. Interes-sents pon sa metter en contact cun Theo Bundi: 043 300 31 31 u elektro-bundi@freesurf.ch

Otg chantadurs vegnan dal Surmir, e deplorablament hai da preschent be in represchentant da l'Engiadina. Il chor mettia gronda paisa da resguardar cun il repertori tuttas regiuns rumantschas, di *Theo Bundi* che presidescha il chor.

Ils gronds concerts dals ultims onns ha il chor da Turitg fatg da cuminanza cun ils auters chors rumantschs da la Basa. Ma i ha mintg'onn era dà differents pitschnas representaziuns en chasas da vegli u a festas da quartier. Igl è era tradiziun ch'il chor chanta mintg'onn en la baselgia Imfeld.

In giuven dirigent

Dapi l'onn passà diregia *Claudio Darms* ils chantadurs. El è scolast da musica al gimnasi Enge e studegia dasperas anc germanistica. L'idea da manar si la messa opus 172 da Josef Gabriel Rheinberger (1839–1901) deriva da Darms.

Il cumponist da Liechtenstein na saja fin uss betg uschè enconuscent. Ma dapi in pèr onns s'engaschia ina uniu per la derasaziun da sia ovra, raquinta Darms. La messa latina ch'el haja tschernì per il concert da giubileum saja vegnida cumponida aposta per chors virils. Plinavant haja quest'ovra l'avantag ch'ins possia manar si ella tant cun orchester sco era cun orgla.

Darms diregia anc in segund chor viril. Cun lez exercitescha el la medema messa. Al concert da giubileum vegnan ils dus chors a chantar ensemen.

Dapi il 1954 en il chor

Ernst Caprez, in chantadur passiuà, è gia pli ch'in mez tschientaner commember dal chor viril. «Jau vom gugent a chantar in quest chor. Jau chant era cun ils Emigrants e vom mintga stad als curs da chant a Breil u Falera.»


Cun ventg onns è Caprez vegnì sco scrinari da Trin a Turitg. El è immediat entrà en il chor viril. Gia a Trin aveva el chantà en il chor viril, en il chor maschadà e sunà en la musica. Cun sia vusch sonora na po el betg sulet chantar bain, ma bain sa chapescha era raquintar in pau da l'istorgia dal chor viril. Quai fa el cun in surrir en fatscha. El sa regorda da temps, nua ch'i aveva per part be pli dus chantadurs per vusch en il chor. U da temps nua ch'i deva dispitas tranter Ladins, Sursilvans, Sutsilvans e Surmirans, sch'i vegniva chantà ina chanzun dapli u da-main en in u l'auter idiom.

Emproma il mardi

Il chor cumenza il mardi saira a las 19.30 cun l'exerchezis. Suentar in'ura da chant intensiv vegn mintgamai fatg ina pitschna pausa e baterlà in'urella. Lura



Ils 26 chantadurs derivan cunzunt da la Surselva, Sutselva e dal Surmir. La fracziun ladina duvrass rinforzament.



Tgi ha gust da chantar, ma na less betg s'obligar per pli ditg? Il Chor viril Grischun da Turitg tschertga chantadurs.



Claudio Darms diregia ils umens dapi l'onn passà. El ha gronds plans per il giubileum dal 2008.

FOTOS C. CADRUVI

cuntinua l'emproma e va fin las 21.30. Tgi che less lura anc star da cumpagnia,

va a prender in sitg en il «Schöneegg». Là reservescha l'ustier mintga mardi ina

pitschna sala per ils chantadurs rumantschs.